



LJ en PJ Vervoer h/a Soutpansberg Veeveilings:

Registrasie nr 2001/056454/23

Plaas De Ruigte, Vivo: Posbus 3, Vivo, 0924: Sel 084 502 3772, E-Pos: [Soutpansbergbonsmara@gmail.com](mailto:Soutpansbergbonsmara@gmail.com)

(As Veilinghuis hierna verwys as die "Afslaer" en die persoon wat die veiling uitvoer, word na verwys as die "afslaer")

### **VEILINGSREÛLS, BEDINGE EN VOORWAARDES**

1. Die Afslaer word hiermee benoem deur die Verkoper om op te tree vir en namens die Verkoper as agent in ooreenstemming met Artikel 54 van die Belasting op Toegevoegde Waarde Wet, 1991, ten opsigte van alle belasting fakture, krediet en / of debiet notas ten opsigte lewendehawe, wild en/of ander goedere aangebied by die veiling of enige koste van vervoer en versekeringspremies wat namens die Verkoper betaal is.
2. Die reëls van hierdie veiling is ooreenkomstig met die bepalinge van Art 45 en alle relevante regulasies tot die Verbruikers Beskermings Wet Nr 68 van 2008.
3. Vir groter duidelikheid, bepaal Art 45(1-4) soos volg:
  - 3.1 Wanneer na veilinge verwys word, sluit dit eksekusie verkopings gemagtig deur 'n hofbevel in, insover die hofbevel vereis dat die verkope van bates deur middel van 'n veiling moet plaasvind.
  - 3.2 Wanneer bates in lotte te koop aangebied word op 'n veiling, elke lot, tot die teendeel bewys word, geag word 'n aparte transaksie te wees.
  - 3.3 Verkope deur middel van 'n veiling word as finaal beskou wanneer die Afslaer die verkoop van 'n spesifieke item of lot as voltooid aankondig deur die val van die hamer of op enige ander gebruiklike manier. Tot en met hierdie aankondiging, kan 'n bod herroep word.
  - 3.4 Vroegtydige kennis moet gegee word as die veiling en/of lot onderworpe is aan:
    - 3.4.1 'n Reserwe of minimum bod; of
    - 3.4.2 Die reg van die eienaar of Afslaer om op die veiling te bie, of enige ander persoon namens die eienaar of Afslaer te bie.
4. Hierdie veilingreëls sal slegs by die veiling uitgelees word indien dit nie beskikbaar was aan die publiek by die besigheidspersone van die Afslaer nie. In die geval van lewendehawe en/of wild veilinge, bly die veilingreëls onveranderd en is dit in die algemeen beskikbaar by die besigheidspersone van die Afslaer en op die Afslaer se webtuiste.
5. Die Afslaer sal slegs die rede vir die veiling aankondig indien dit enige rede anders is as 'n vrywillige verkoop van goedere deur die eienaar.
6. Tot en met die toestaan van 'n bod deur die Afslaer, soos bedoel in Art 45(3), is die Afslaer geregtig om enige bod te verwerp wat nie aan die regulasies voldoen nie en die hoogste bod aan te wys.
7. Hierdie veiling is nie 'n absolute veiling nie, maar onderworpe aan reserwe pryse vasgestel deur die Verkoper en uitgewys deur die Afslaer voor die verkoop van elke bate of lot. Indien geen bod dieselfde of hoër as die vasgestelde prys is nie, mag die lot onttrek word van die veiling.
8. Hierdie veiling sal op die datum en tyd begin soos geadverteer of gepubliseer en sal nie uitgestel of later begin om enige lid of groep van die publiek in staat te stel om aan die veiling te mag deelneem nie.
9. Indien die Afslaer bewus raak van enige fout of advertensie materiaal of enige ander publikasie of enige wysiging in hierdie veilingreëls, sal die Afslaer spesifiek die wysigings in die reëls uitwys sowel as die foute in die advertensie of publikasie.
10. Enige persoon wat die veiling bywoon om self te bie moet, voor die aanvang van die veiling, registreer as 'n Koper op die kopersrol en voldoen aan die vereistes soos voorgeskryf in Hoofstuk 1 van FICA 2001 en die kopersrol/koperskaart onderteken.
11. Enige persoon wat die veiling bywoon om namens 'n ander persoon te bie, moet behoorlik daartoe gemagtig word deur middel van 'n magtigingskrywe van sy prinsipaal en beide die persoon en sy prinsipaal moet voor die veiling op die kopersrol registreer deur die nodige informasie te verskaf soos voorgeskryf in Hoofstuk 1 van die regulasies uitgereik in terme van FICA 2001 ten opsigte van die bewys van identiteit en moet die kopersrol/koperskaart onderteken.
12. Waar die prinsipaal 'n maatskappy is, sal die magtigingskrywe op die briefhoof van die maatskappy verskyn en vergesel word met 'n gesertifiseerde afskrif van die resoluasie wat die persoon magtig om so te doen. (Vir doeleindes van hierdie reël, sluit die verwysing na maatskappy ook 'n verwysing in na enige juridiese persoon, insluitend vennootskappe, trusts of regsliggame).
13. Alle Kopers het 'n reg om die bates te koop aangebied te inspekteer en die Afslaer sal redelike tyd en toegang hiervoor toelaat voor aanvang van die veiling. Deur te bie, erken die Koper die goedere was geïnspekteer en is heeltemal tevrede daarmee.
14. Alle lewendehawe, wild en bates word voetstoots verkoop en die Kopers geniet nie die beskerming soos uiteengesit in Art 55 en 56 van die Verbruikers Beskermings Wet nie.
15. Enige inligting verstrekkend met betrekking tot die gehalte, teling, geslagsboom, ouderdom, datum van dekking, kondisie, reprodusiewe status of vermoë, vrugbaarheid, gesondheidstoestand, produksievermoë, massa of enige aspek van die lewendehawe en/of wild, word deur die Verkoper verstrekkend en enige wanvoorstelling deur die Verkoper is sonder die medewete of samewerking van die Afslaer. Enige verhaalsreg voortspuitend uit so 'n wanvoorstelling sal uitsluitlik teen die Verkoper wees.
16. 'n Bod gemaak sluit nie Belasting op Toegevoegde Waarde in nie. BTW sal, waar van toepassing, by die prys gebie gevoeg word op alle fakture wat uitgereik word.
17. Alle verkope geskied kontant (EFT) en die koopprys is onmiddellik betaalbaar aan die Afslaer na aanvaarding van die bod, tensy vooraf anders met die Afslaer ooreengekom is. Enige kontantbetalings is verder onderworpe aan kontant of enige ander hanteringsfooie. Sou die koper egter versuim om binne 7 dae van lewering te betaal, is die Afslaer geregtig om rente by die uitstaande bedrae te voeg, bereken teen die huidige bank prima koers plus 5%, maandeliks bereken en gekapitaliseer.

18. Indien die Koper nie die koopprys onmiddellik betaal nie en verder geen gepaste reëlings met die Afslaer getref het nie, sal/kan die Afslaer die verkoop kanselleer en die bate of lot as onverkoopte bates hanteer en dit of weer aanbied op die veiling of by afloop van die veiling uit die hand uit namens die Verkoper verkoop, afhangend van die Verkoper se mandaat aan die Afslaer.
19. Eiendomsreg in die lot sal gevestig bly in die Verkoper totdat die koopprys daarvan ten volle aan die Verkoper verreken is, met die voorbehoud dat risiko in die bates of lot reeds by toestaan van die bod oorgaan na die Koper soos uiteengesit in klousule 25.
20. Indien die Koper wel vooraf gepaste reëlings met die Afslaer getref het, magtig die Koper die Afslaer hiermee om die koopprys, koste van vervoer en versekering of enige ander ooreengekome koste, minus die Afslaer se kommissie, namens die Koper aan die Verkoper en ander diensverskaffers te betaal, in welke geval die gemelde koopprys, en koste geag word gelde geleen en voorgeskiet te wees, die terme waarvan ooreengekom is met die Koper in 'n aparte kredietooreenkoms of koopoooreenkoms. Alle betalings in terme van hierdie klousule wat deur die Afslaer gemaak moet word aan die Verkoper namens die Koper sal deur die Afslaer gemaak word na verstryking van 5 werksdae vanaf datum van lewering aan die Koper. Betalings voor verstryking van die 5 werksdae deur die Afslaer aan die Verkoper word gemaak in die uitsluitlike diskresie van die Afslaer en is nie 'n afdwingbare vergunning nie.
21. Solank enige bedrag hierkragens deur die Koper aan die Afslaer verskuldig is, mag die Koper, waar die bates die onderwerp van sekuriteit is vir die Koper se kredietfasiliteit met die Afslaer, nie afstand doen van die besit van die bates nie en mag die Koper nie die bates of enige van sy regte of verpligtinge kragens hierdie ooreenkoms sedeer, afstaan, verpand of andersins beswaar, verkoop, vervreem of aanbied om die voornoemde te doen, of toelaat dat die bates onderworpe raak aan enige retensiereg, hipoteek, pand of ander beswaring of geregtelike beslaglegging wat ookal die oorsaak daarvan nie. Die Afslaer kan sy regte en belange hierin sedeer, afstaan of vervreem, sonder afstanddoening of benadeling van sy reg van invordering van enige gelde aan die Afslaer verskuldig.
22. Waar die Verkoper by die aangaan van hierdie veiling reeds 'n bedrag verskuldig is aan die Afslaer of enige filiaalmaatskappy of firma van die Afslaer, ongeag die skuldoorsaak van sodanige verskuldigheid, magtig die Verkoper die Afslaer onherroeplik om die koopprys hiervan (minus die Afslaer se kommissie) teen die Verkoper se rekening te krediteer, synde betaling van die koopprys namens die Koper te wees.
23. Waar die Afslaer, in terme van die 'n kredietooreenkoms gelde geleen of voorgeskiet het aan die Koper vir die betaling van die koopprys van die bates en die vervoerkoste en versekeringspremies, sal geen verweer hoegenaamd wat die Koper teen die Verkoper of vervoerkontraakteur of versekeraar het, geopper word teen die Afslaer nie en sal die Koper steeds verplig wees om alle bedrae, tesame met ander rente en kostes kragens die kredietooreenkoms of koopoooreenkoms verskuldig aan die Afslaer te betaal. Die bepaling van hierdie klousule plaas geen beperking op die Koper se reg om regte/remedies wat hy mag hê teen die Verkoper, vervoerkontraakteur of versekeraar uit te oefen nie.
24. Nog die Koper nog die Verkoper sal met betrekking tot enige bedrag hierkragens verskuldig geregtig wees om skuldvergelyking toe te pas of betalings te weerhou ten opsigte van eise teen mekaar of teen die Afslaer.
25. Elke lot sal onmiddellik nadat die bod toegestaan is geag word as gelewer aan die Koper en sal daarna op die uitsluitlike risiko van die Koper wees, wie op eie koste die lot of bate van die veilingsterrein sal verwyder. Verwydering van enige bates of lotte sal egter slegs toegelaat word na betaling van die koopprys deur die Koper tensy die gepaste reëlings met die Afslaer getref is en hy toegestem het tot verwydering.
26. Die kopersrol en die vendurol is beskikbaar vir geregistreerde Kopers vir inspeksie deur middel van 'n skriftelike versoek en met goeie rede, gedurende besigheidsure by die besigheidspersone van die Afslaer.
27. Die Afslaer sal onder geen omstandighede hoegenaamd deur enigiemand aanspreeklik gehou word vir enige verlies of skade van enige aard hoegenaamd, hetsy direkte of indirekte skade of gevolgschade of andersins gelyk deur enigiemand, indien die lewendehawe en/of wild op die veilingsterrein onder kwarantyn geplaas word as gevolg van die aanwesigheid van 'n beheerde veesiekte onder enige lewendehawe en/of wild op die veilingsterrein nie. Die Afslaer sal die reg hê om die veiling te staak en elke koop nietig te verklaar en geen party hoegenaamd sal enige verhaalreg teen die Afslaer hê met betrekking tot die uitoefening van hierdie bevoegdheid van die Afslaer nie.
28. Partye wat enige permitte, verwyderingsertifikaat, dokumente van identifikasie of enige ander statutêre voorgeskrewe dokument benodig, is self aanspreeklik vir die verkryging daarvan. Enige opdragte aan die Afslaer met betrekking tot die laai, en/of vervoer en/of keuse van vervoerkontraakteurs en/of versekering en/of keuse van versekeraars en/of versorging van die lewendehawe en/of wild of goedere voor of na afloop van die veiling, word uitgevoer op die algehele risiko van die Koper of Verkoper, na gelang van die geval en die Afslaer sal nie aanspreeklik gehou word vir enige verlies of skade van enige aard hoegenaamd, hetsy direkte, indirekte, gevolgschade of andersins, wat gelyk mag word as gevolg van enige opdragte van 'n Verkoper of Koper uitgevoer deur die Afslaer. Die Afslaer aanvaar egter verantwoordelikheid soos bedoel in Art 65(2) van die Verbruikers Beskermings Wet terwyl die goedere of lewendehawe en/of wild onder beheer van die Afslaer is. Enige ooreenkoms wat die Afslaer met die vervoerondernemer of versekeraar mag aangaan, word deur die Afslaer aangegaan as die verteenwoordiger van die Koper of die Verkoper, na gelang van die geval. Alle vervoerkoste en versekeringspremies is vooraf betaalbaar aan die Afslaer in kontant tensy reëlings tot die bevrediging van die Afslaer hieroor getref is.
29. Die Koper en die Verkoper stem toe tot die jurisdiksie van die Landdroshof soos beoog in Artikel 45 van Wet Nr 32 van 1944 ten opsigte van enige aksie wat die Afslaer teen die Koper of Verkoper mag instel, ondanks dat die aangeleentheid, eisoorzaak, bedrag of waarde die regspraak van daardie Hof mag oorskry, wat kragens Artikel 28 van die voornoemde Wet jurisdiksie ten aansien van die Koper of Verkoper het. Nieteenstaande die voorafgaande, sal die Afslaer in sy uitsluitlike en absolute diskresie die reg hê om 'n regsgeding in enige Hooggeregshof van bevoegde jurisdiksie in te stel.
30. Enige regskoste wat deur die Afslaer aangegaan word as gevolg van enige nie-nakoming van die Koper of Verkoper se verpligtinge hierkragens, insluitende invorderingskommissie, sal deur die Afslaer verhaal word van die Koper of Verkoper, nagelang van die geval, op die skaal soos tussen prokureur en eie kliënt.
31. Geen wysiging, verandering of novasie van of byvoeging tot hierdie voorwaardes en geen afstanddoening deur die Afslaer van enige van sy regte hierkragens sal enigsins van krag wees tensy dit op skrif gestel is en onderteken is deur die Afslaer nie.
32. Geen toegewing of vergunning wat deur die Afslaer aan die Koper of Verkoper toegestaan word sal geag word om 'n afstanddoening te wees van enige van die Afslaer se regte hierkragens nie en sodanige toegewing of vergunning sal nie geag word of vertolk word as 'n novasie hiervan nie.
33. Indien enige bepaling hiervan onwettig is of retrospektief onwettig gemaak word, sal daardie onwettige bepaling geag word as deelbaar van die res van die bepaling hiervan en pro non scripto.
34. Die Koper kies die fisiese adres wat op hierdie dokument gespesifiseer word (of die keersy) of aangedui word op enige dokument wat deur die Koper onderteken is of deur die Koper aan die Afslaer of die Verkoper in verband met hierdie Veiling gegee is, as sy domicilium citandi et executandi en vir diens van alle en enige kennisgewings wat vereis word in verband met of voortspruitend uit hierdie Veiling.
35. Die Afslaer behou die reg voor om hierdie Veilingsreëls skriftelik te wysig.
36. Deur 'n bod te betree, bind enige voornemende koper homself of haarself aan hierdie Veilingsreëls.